



# Ang Banagbanag

*Ang Mantalaan sa Presensya ni Kristo*

**The Dawn in the Cebuano dialect**

# Magdayeg Para Sa Hustisya Sa Diyos

***Yabeng Bersikulo:  
“Malipayon siya nga  
anaa kaniya ang Dios  
ni Jacob alang sa  
iyang panabang,  
Kansang paglaum  
anaa kang Jehova nga  
iyang Dios: Siya nga  
nagabuhay sa justisya  
sa mga dinaugdaug;  
Siya nga nagahatag sa  
makaon sa mga  
gigutom. Si Jehova  
nagapagawas sa mga  
binilanggo.”  
—Salmo 146:5,7  
Piniling Sulat:  
Salmo 146***

**SA ATONG PAGTOLUN-AN,** Ang Salmista nagpahayag ug pasalamat ggikan sa kahaladman sa iyang kasingkasing pahinungod sa Magbubuhay nga angayan pagadaygon. “Dayegon ninyo si Jehova. Dayega si Jehova, Oh kalag ko. Samtang buhi pa ako magadayeg ako kang Jehova: Magaawit ako ug mga pagdayeg sa akong Dios samtang buhi pa ako.”—Salmo 146:1,2

Dili gusto ni David nga magbutang ang si bisan kinsa ug pagsalig kaniya o ni bisan kinsa nga tawo, bisan paman ang mga prinsiphe. Bisang unsa pa ka kusgan, maalam, o buotan, dili kini sila masaligan nga kanunay silang matinudanon sa ilang mga gipamulong. (Berso 3) Hinonoo, ang tibook nga pagsalig atong ibutang sa Diyos, diin ang tanan nga saad matood.—Santiago 1:17

Sa natala sa Genesis, ang bayad sa paglapas ni Adan sa pagkaon niya sa ginadiling prutas klaro nga giingon nga kamatayon. Bisang adunay dako nga pagtoo nga ang kalag dili mamatay, kana nga panghunahuna gisupak sa Bibliya. (Mateo 10:28) Kung walay paglaum sa pagkabanhaw sa mga patay, nga gihimong posible pinaagi sa pagsakripisyo ni Hesus sa paghatag niya sa perpektong kinabuhi isip lukat sakripisyo para ni Adan

ug iyang kaliwat. Kadtong adtoa sa lubnganan magpabilin hangtud sa kahangturan sa kahimtang nga walay panimuot ug nahanaw na. “Mogula ang iyang gininhawa, sa yuta siya mobalik; Nianang maong adlaw mahanaw ang iyang mga hunahuna.”—Salmo 146:4

Ang atong yabeng bersikulo nagtudlo nga iya kadto sa Diyos nga espesyal nga pag atiman sa iyang karaang katawhan nga Israel nga gipakita sa pagluwas kanila gikan sa pag ulipon kanila sa Ehipto. Ang iyang pag amoma iya usab gipakita sa paghatag niya ug manna gikan sa langit sa kinatibuk-an nilang byahe sa kamingawan. Siya mao usab ang Diyos nga maghatag ug hustisya ug panalangin sa tanang banhawong tawhanong banay sa ilang pag uba ug duyog sa iyang tumong ug plano.

Si Jehova nagapabuka sa mga mata sa mga buta; Si Jehova nagapabangon kanila nga nanghiumod; Si Jehova nahigugma sa mga matarung. Si Jehova nagabantay sa mga dumuloong; Siya nagasapnay sa mga ilo ug sa mga balo nga babaye; Apan ang dalan sa mga dautan iyang ituali.” (Bersos 8,9) Ang instrumento sa Diyos para makab-ot kining tanan mao si Hesukristo, nga naghatag sa iyang kinabuhi isip lukat bayad para sa tanang katawhan.—I Timoteo 2:5,6

Si Hesus gihalad sa tuyo nga mawala ang sala ug sa ingon mahimong perpekto sa tanang butang aron malukat si Adan ug ang iyang kaliwat. Ang atong Ginoo, usa ka tawo nga masulob-on dili tungod kay adunay kakulangan sa iyang pagkatawo. Apan tungod sa iyang pagka perpekto, iyang nabati sa hugot ang kalisod ug kasakit sa nalaglag nga katawhan nga naglibot kaniya. Ang iyang perpektong pamalatian naghatag kaniya ug katakos nga makasulod sa kagul-anan sa mga kabus, pag agulo ug sa himalatyong kalibutan sa tawo. Sa daghang mga higayon sa iyang pag sangyaw iyang gihatag ang iyang kaugalingong kahimsog ug kusog para ayohon kadtong mga nag antus ug sa ingon mahibalik ang ilang kusog ug kahimsog bisan mawad-an pa siya sa iyang kaugalingong kusog.—Isaias 53:4; Lucas 6:17,19

Kung maestablisar na ang gingharian sa Diyos, ang iyang gugma ug hustisya makita ug mabati na unya sa tanan. Nianang panahona, ang mga sentimento diha sa katapusang berso matuman na. “Si Jehova magahari sa walay katapusan, Ang imong Dios, Oh Sion, ngadto sa tanang mga kaliwatan. Dayegon ninyo si Jehova.”—Salmo 146:10

# Si Jehova Nagsaad Ug Matarong Nga Ginoo

***Yabeng Bersikulo:  
“Kay alang kanato ang  
usa ka bata natawo,  
alang kanato ang usa  
ka anak nga lalake  
gihatag; ug ang  
kagamhanan  
igatungtong sa iyang  
abaga: ug ang iyang  
ngalan pagatawgon  
Kahibulongan,  
Magtatambag, Dios  
nga Makagagahum,  
Amahan nga walay  
Katapusan, Principe sa  
Pakigdait.”  
—Isaias 9:6***

***Piniling Sulat:  
Isaiah 9:2-7***

**ANG PINAKADAKO NGA GASA SA DIYOS** ngadto sa himalatyong kaliwat sa katawhan gisaad sulod sa kapanahunan sa Daan nga Kasulatan—ang pag-abot sa iyang bugtong nga anak, ang Mesiyas, si Hesukristo, nga nag presenter sa iyang kaugalingon ngadto sa nasud sa Israel nga mao ilang hari sulod sa iyang unang pag abot o adbyento.

“Ang katawhan nga naglakaw sa kangitngitan nakakita ug usa ka dakung kahayag: sila nga nagpuyo sa yuta sa landong sa kamatayon, misidlak sa ibabaw nila ang kahayag. Imong gipadaghan ang nasud, imong gipatubo ang ilang kalipay: sila nagakalipay sa imong atubangan sumala sa kalipay sa pag-ani, ingon sa mga tawo nga nanagkalipay sa ilang pagbahin sa inagaw.” (Isa. 9:2,3) Ang Ginoo mao ang kahayag sa tibook kalibutan sulod sa iyang pagsangyaw didto sa Galilea. Sulod sa panahon sa Gospel o

Ebanghelyo, ang iyang mga konsagradong sumusunod maoy representante sa mao nga kahayag pinaagi sa pagpakita sa gisaad nga gingharian sa katarong diin ang kondisyon sa sala, sakit, pag-antus ug

kamatayon mahanaw na sa dayon. Ang tanan gawas sa mga nahisakop sa Simbahan ni Kristo, ang nasud sa Israel ug ang katawhan sa kinatibuk-an, ubos sa impluwensya ni Satanas, nga gibutahan sa himaya nga pagtoo sa kaluwasan nga maoy resulta sa pagkamatatud-anon sa atong Manluluwas sa iyang pagsakripisyo sa iyang kinabuhi sa kalbaryo.—II Cor. 4:4; Heb. 2:9

Sa tibook kasaysayan, ang katawhan gidaug sa sala ug kadaut nga naghari sa atong katilingban. Ang kahupayan niining kabug-aton hinoon, paaboton hangtod nga makumpleto ang pangasaw-onon ni Kristo, nga pagabayawon aron magdumala uban kang Kristo kon ang gingharian sa katarong magsugod na.

“Nahibalo kita nga ang tibuok kabuhatan nanagduyog sa pag-agulo sa pagbati hangtud karon; ug dili lamang ang kabuhatan ra, kondili kita gayud usab nga mga nanagpakabaton sa unang mga bunga sa Espiritu nagaagulo sa sulod nato samtang nagapaabut kita nga mahinamon nga pagasagupon ingon nga mga anak, nga mao ang pagtubos sa atong mga lawas. (Roma 8:22,23) Pinaagi sa simbolo nga pinulungan, ang bibliya nga ang tanang dautang kabatasanan gub-on ug ang katawhan pagahugasan gikan sa landong sa kasaypanan pinaagi sa makataronganong paghari ni Kristo sa panahon sa gingharian sa Diyos.—Isa. 9:5

Ang atong yabeng bersikulo nagsaysay sa kadaghang titulo ug pangalan nga kauban kang Kristo ug iyang lawas, nga mamahimong kauban niya sa pag establisar sa mga balaod ug regulasyon nga mopatigbabaw sa panahon sa paghari sa katarong. Seguradong ang mga titulo nga pagatawgon Kahibulongan, Magtatambag, Dios nga Makagagahum, Amahan nga walay Katapusan, Principe sa Pakigdait makapadasig kanato sa atong pagpaabot sa pag establisar sa iyang gingharian.

“Sa kauswagan sa iyang kagamhanan ug sa pakigdait walay katapusan, ibabaw sa trono ni David, ug sa ibabaw sa iyang gingharian, aron sa pagtukod niini, ug sa pagtuboy niini nga may justisya ug pagkamatarung sukad karon bisan hangtud sa walay katapusan. Ang kakugi ni Jehova sa mga panon maoy magahimo niini. Ug unya magaabut ang katapusan, inigtugyan na niya sa gingharian ngadto sa Dios ug Amahan, tapus niya

mawagtang ang tanang pamuno-an ug tanang kamandoan ug kagahum. Kay kinahanglan magahari siya hangtud nga ang tanang mga kaaway niya ikabutang na niya diha sa ilalum sa iyang mga tiil. Ug ang katapusang kaaway nga pagalaglagon mao ang kamatayon. Kay ang Dios magapahiluna sa tanang mga butang aron kini mahisakop niya ilalum sa iyang mga tiil." Apan sa pag-ingon niini nga, "Ang tanang mga butang gipahiluna nga mahisakop ilalum kaniya," tataw nga wala mahilakip niini ang Dios nga mao ang nagapahiluna sa tanang mga butang sa ilalum niya. Ug sa diha nga mahisakop na ang tanang mga butang ilalum kaniya, nan, ang Anak pagasakopon usab ilalum kaniya nga mao ang nagapahiluna sa tanang mga butang ilalum kaniya, aron ang Dios mahimong tanan ngadto sa tanan.—I Cor. 15:24-28

# Ang Diyos Nagsaad ug Matarong Nga Sanga

***Yabeng Bersikulo:  
“Ania karon, ang mga  
adlaw moabut na,  
miingon si Jehova, nga  
ako magapatindog  
alang kang David, usa  
ka matarong nga  
Sanga, ug siya  
magahari ingon nga  
hari ug magadumala  
sa  
pagkamanggialamon,  
ug ipakanaug niya ang  
justisya ug ang  
pagkamatarong dinhi  
sa yuta.”***

***—Jeremiah 23:5***

***Piniling Sulat:  
Jeremiah 23:1-6;  
33:14-18***

**SA ATONG LEKSYON KARON**, gisulti sa Diyos pinaagi kang Propeta Jeremias ang umalabot ng paghukom sa Juda tungod kay ang iyang mga namuno, wala ayuha pag amoma ug pag protektar ang katawhan. “Alaut ang mga magbalantay nga nanaglaglag ug nanagpatibulaag sa mga Karnero sa akong sibsibanan! nagaingon si Jehova. Busa mao kini ang giingon ni Jehova, ang Dios sa Israel, batok sa mga magbalantay nga nanagpakaon sa akong katawhan: Kamo nagpatibulaag sa akong panon, ug nanag-abog kanila, ug wala modu-aw kanila; ania karon, ako modu-aw batok kaninyo tungod sa kadautan sa inyong mga buhat, nagaingon si Jehova.—Jer. 23:1,2

Sa pagka masalaypon, nagka lain laing namunuan ang naga aghat nga mag simba sa mga idolo imbes mosunod sa ilang Diyos, nga nagresulta nga ang nasud mailog sa Babelonya. Dili tanang mga Hudeo namatay sa espada sa dihang ubos pa sila sa

Babelonya. Sa dihang si Cyrus naghatag ug permiso nga mobalik na sila sa Israel aron balikon pagtindog ang ilang templo, gamay lamang ang midawat niini, kadaghanan kanila mipili nga magpabilin didto. Ang panagna ni Jeremias padayon nga nag-ingon nga adunay moabot nga mga

magbalantay sa ibabaw nila nga magapakaon kanila; ug sila dila na mahadlok pag-usab, ni malisang pa, ni makulangan sila. (berso 4) Bisan tood adunay uban, sama ni Nehemia ug Zerubbabel, nga nagpakanaog ug mga matarong nga balod para niadtong namalik sa ilang lugar, nagpabilin gihapon ang kahadlok ug kadismaya. Kini nagpakita nga ang dako nga katumanan sa propesiya ni Jeremias gisaysay sa umalabot nga panahon.

Ang Israel mao lamang nga nasud nga giila sa Langitnong Amahan ug diin adunay gihimo nga kasabutan. Pero, tungod sa pagkapakyas nila nga maghinulsul, isip usa ka nasud wala sila nakabaton sa husto nga kasinkasing sa pagdawat sa ilang Mesiyas sa una niyang pag anhi. Sa pagdeklarar ni Hesus sa balay nga mamingaw, ang ilang naandang hanay ug sistema sa pagsakripisyo gisalikway ug ang ilang kaparian wala na giila sa Diyos. Sa katapusan, giguba sa mga Romano ang ilang mga templo ug sa kaulahian, giguba nila ang siyudad. Ang epekto niining tumang pagkagun-ob mao nga nasabwag ang mga Hudeo sa nagkalain laing parte sa kalibutan.

Ang atong yabeng bersikulo naghulagway sa umalabot nga gingharian diin ang tanang Israel magkatipok pag usab isip usa ka katawhan. Kini nga propesiya mahitungod ni Kristo ug iyang iglesya, isip sumusunod sa trono sa Diyos, nagpakita, nga sila matarong nga “sanga” ug “hari”, nga maoy magestabilisar sa usa ka matarong nga pangagamhanan nga molungtad sa kahangturan. Kini nga pangagamhanan dili lamang maghiusa sa tibook nga Israel kondili, sa katapusan maoy mosakop sa tanang kanasuran sa kalibutan.

Sa tibook nga paghari sa sala ug kamatayon, ang tawhanong banay naghigwaos sa silaw sa paglaum nga adunay kaayuhan ang tanan para kanila. Unsa kalipay ang ilang mabati sa ila unyang pagbalik gikan sa mga lubnganan ug makigdait diha sa kahan-ayan sa Diyos. Kana nga panahon nga dugay na gisulti sa mga propeta moabot ra unya ug adunay dakong pagmaya ug pagdayeg nga ihatag sa Langitnong Amahan.

Pagka katingalahan sa atong Diyos, dili lamang daghan ug bahandi nga nakagahin para sa mga matinud-anon nga mga sakop sa lawas ni Kristo niining panahon sa Ebanghelyo, apan naghatag usab ug mga grasya ug panalangin sa kada usa ka sakop sa naluwas nga kaliwat, ug sa tibook

nilang kasingkasing ilang pagadayegon ug simbahon ang atong  
Magbubuhat hangtud sa kahangturan.

# Ang Diyos Nagsaad Nga Magauban Kanato

***Yabeng Bersikulo: “Ug ibutang ko ang usa ka magbalantay ibabaw kanila, ug siya magapasibsib kanila, bisan pa ang akong alagad nga si David; siya magapasibsib kanila, ug siya mahimongilang magbalantay.” —Ezequiel 34:23***  
***Piniling Sulat: Ezekiel 34:23-31***

**SA TIBOOK EZEQUIEL 34**, gipakita ang kalainan tali sa bakak nga magbalantay o namuno sa Israel nga dili interesado sa kaayohan sa katawhan, ug sa Diyos, kinsa Dakong Magbalantay moluwas sa iyang mga karnero nga nahisalaag sa iyang pagatiman.—bersos 1-10

“Ingon sa usa ka magbalantay nga magasusi sa iyang panon sa adlaw nga anaa siya sa taliwala sa iyang mga karnero nga nanagkatibulaag ngadto sa halayo, mao man pangitaon ko ang akong mga karnero; ug luwason ko sila gikan sa tanang mga dapit diin sila managkatibulaag sulod sa madag-um ug mangiub nga adlaw. Ug kuhaon ko sila gikan sa mga katawhan, ug tigumon sila

gikan sa kayutaan, ug dad-on ko sila ngadto sa ilang kaugalingong yuta; ug akong pasibsibon sila sa kabukiran sa Israel, ubay sa kasapaan sa tubig ug sa tanang mga gipuy-an nga mga dapit sa yuta.”—bersos 12,13

Bisan si Ezequiel gitagaan ug tahas sa pagsangyaw sa katarong sa mga Israelitas sa didto pa sila sa Babelonya, ang Diyos nasayod na daan nga sila magpadayon sa ilang pagkamasinupakon hangtud pa sa tapos na sila maulipon. Ug kini moresulta sa ilang pag katagkatag sa nagka lain laing nasud sa kalibutan.—bersos 16-21

Bisan paman sa pagka masupilon sa Israel, ang pagsalikway sa iyang Mesiyas, si Hesukristo ug ang mga paglutos nga ilang nadawat tungod sa

kadautan, si Propeta Ezequiel nagsaad sa kaluwasan ug pag hiuli sa tanan.—berso 22

Ang yabeng bersikulo nag deklarar nga ang Israel mapanalanginan kung ma establisar na ang gingharian sa Diyos dinhi sa yuta pinaagi sa sulugoon sa Diyos nga si David. Dinhi nga bersikulo, si David mao ang simbolo ni Kristo, nga mao ang tinud-anay nga maghari sa gingharian sa Diyos. Ang minahal nga si David sa nangaging panahon pagabangonon gikan sa lubnganan, ug maga silbi usab unya sa matarong nga pangagamhanan dinhi sa yuta.

Sa panahon sa katarong, atong makat-onan nga ang kabukiran magapatulo sa matam-is nga vino, ug ang kabungtoran magapaagay sa gatas, ug ang tanang mga sapa sa Juda magapaagay sa tubig; ug ang usa ka tuburan motungha gikan sa balay ni Jehova, ug tubigan niini ang walog sa Sittim. Kini siya naga simbolo sa vino nga matood nga doktrina, ang gatas naga simbolo sa kamatooran, ug ang tubig sa kinabuhi nga nagdala ug ug mga panalangin ug kalinaw sa Israel ug ang tanan nga mamahimong “Israelitas gayud” sa gingharian sa yuta.—Joel 3:17,18; Isa. 55:1

Ang Israel, isip pinili nga katawhan sa Diyos kaniadto, magatamod na sa pag atiman sa Dakong Magbalantay kanila. Dugang pa, sa dalan sa pagka balaan, ang tanang katawhan mag malipayon na kay ang nangaging mga sitwasyon nga napuno sa sala mawala na ug ang kalipay nga walay katapusan anha sa ibabaw sa ilang mga ulo: sila makadawat sa kasadya ug kalipay, ug ang kasubo ug ang panghukaw mangahanaw.—Isa. 35:10

Sa karon nga panahon, ang matood lamang nga mga karnero sa Diyos, mao ang iyang simbahan, mao lamang ang makadungog ug magasunod sa tingog sa iyang agalon. (Juan 20:27) Pero, si Kristo namatay para maghatag ug oportunidad sa kaluwasan para sa tanan, busa adunay ubang mga karnero nga ginsakpan sa yuta nga maka benepisyo sa iyang dakong pagsakripisyo.—berso 16

Ug sa ingon, sa pag abot sa hustong panahon matuman na ang mga pulong nga gitudlo ni Hesus sa iyang mga tinun-an —“Muabot ang imong gingharian, matuman ang imong pagbuot dinhi sa yuta maingon man sa

langit.” (Mateo 6:10y) Ang Diyos tinood gayod nga magauban sa tanan nga gusto mahimong iyang karnero niana nga panahon.